

Fizos de monte

T'ido in su canale da lontanu
 Desul'in mesu 'e birde fioridu,
 da gennargentu pares parturidu
 in cuss'altura pomposu e galanu.

In totta sa Sardigna tenes'lumene
 pro zente colta e pro s'artigianadu,
 fatt'a telarzu e bene ricamadu
 a filos d'oro interu su costumene.

Sos fizos tuos sunt fortes e sanos
 che sas roccas e s'abba cristallina,
 ca respiran s'aera muntagnina
 profumad'in istioso e beranos.

Ambulantes girend'in bidd'istranza
 cun cadditos e beltulas a coddu,
 pro cuberare pane e calchi soddu
 cun sonazas, tazeris e castanza.

Su tempus oe 'enidu est differente
 c'has trivagliadu e tenes su meritu
 cun mezzos bonos prestu atteru situ
 falas da Desul'a s'Iglesiente.

Pro intagliu 'e sa linna veros mastros
 ogn'un'est cun sas manos un'artista,
 sas feminas tessende ogan'a vista
 tappetos fioridos e arazzos.

Tenes riccos porcarzos e pastores
 ch'hant prosciuttos, cun latte casu e lana,
 e in s'ieru a sa muntagna sana
 benin de tesu sos isciadores.

Desulu ses poeticu e tind'onoras
 dae tempos'antigos has su vantu,
 zente chi ti cumponed'unu cantu
 nd'haias prima e nd'has fines'ancora.

Su fizu tou, mannu Montanaru
 de fama sarda e pur'in continente,
 t'hat fatt'onore, e ses riconoscente
 li pones'oe sa coron'e laru.

Cust'iniziativa in mannu istile
 chi faghes a impegnu e tantu cura,
 apperzada sa janna a sa cultura
 ad ogni classe tua giovanile.

Baueri

FRANCESCO NOLI

TONARA